

KERWEREDD 1976

Straußbuwe !!!!

Es geht wärer los er liewe Leit,
die Nerrermohrer Kerb zu feiere wie in alder Zeit.

Ä ganzes Johr ist jetzt schon rum,
drumm seid ehr jetzt zu uns doruffer kumm.

Mer hann uns e paar Woche lang schunn abgemieht,
drum zeigt heit awwer a eier gut Gemiet.

Recht herzlich willkomme dohowe,
egal ob nichtern oder besoffe.

Mir griese die Alte und a die Junge,
sowie die Gescheite unn die Dumme.

Net zu vergesse die große Lumpe,
die iwwer die Kerb ess Bier saufe aus Humpe.

Es Fernseh is seit Vorsjohr schon ingelad,
die hann uns awwer schon wider abgesagt.

Aber deshalb sind mer noch lang net traurig,
es Ramster Plätche macht sei Bilcher, das glaub ich.

Mit dem Wetter, do ham mer noch Glück gehat.
Wenns schlechter wär, do wär die Kerb geplatzt.

Die Red iss nur fer gute Genieser,
net fer Gelehrte und bäuerliche Spießer.

Wems in de falsche Hals gerät,
der geht besser häm und bät.

Er stehn do unne unn klotze doruff,
während ich uff de Läder häng in meinem Suff.

Mei Hals is trocke, ich muß was schlucke,
dun ehr jetzt lieber uff die Musik gucke.

Die spelt zum Ufftakt ganz heiter,
oh, wie wohl is mir uff de Leider.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Bei manche Leit, do geht es rund,
do werd es Wasser noch mit de Hand gebummt.

Bei de Ammi dud er de Owe heize,
dehem muß er hinner die Mischtkaut schieße.

De Besuch hat em Hans die Schüssel geklaut,
seitdem hat die Nachbarschaft nur noch gemault.

Paar Dach druff an de Konfirmation,
Do war e große Demonstration.

Die Verwandtschaft wollt es Wasser losse,
Doch sie kame net aus de Gosse.

Uff em Hans sei Platz, do wollte se net grase,
drum hans se misse in die Nachbarschaft rase.

Es Elsje wollt uff die alt Toilett,
do is es awer in de Deer stecke bleb.

De Hans hat gezerrt wie a Närr,
schun wärs dozwische heit schun verderrt.

Die Musik spielt dem Hans voller Rasse:
“Ein eigener Klo ist doch schon wirklich klasse!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

De Rudi hat die Wertschaft im Stich geloss,
De Otto hat in der Zeit die Blume am Fenster gegoss.

Es hat awer gar net lang gedauert,
Do han schun welche druff gelauert.

Die han se gemiet fer drei ganze Johr
unn han jetzt schun ehr ganzes Vermöge verlor.

Es Paula is die Chefin im Lade
un is als ganz schä gelade.

De Waldi hatse vor die Deer gesetzt,
der is dann hem wie gehetzt.

Em Paula sei Freind, genannt es Schmittche Schleicher,
Is immer noch kee Reicher.

De Karl-Heinz is als Zasselwirt
von de Nerremohrer Leit ganz hin und her gezerrt.

Er fährt e Mofa, des brennt öfters als es laaft.
Es werd Zeit, daß er sich e neies kauft.

Ehr Nerremohrer, geen in die Wirtschaft zum saufe,
de Karl-Heinz will net länger laufe.

Die Musik spielt dem Zasel gekennt:
“Oh, wie schön ist’s, wenn’s Mofa nicht brennt!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Do gabs noch so e Fall im Ärt,
do han se in de Wertschaft ganz schä rumgeblärrt.

Die Weibslait han Geburtstag gefeiert,
am nächste Daach han se sich iwers Dorfgespräch geeiert.

Die Leit han verzeehlt, es war bees was geloff,
die hätte gelacht unn viel gesoff.

Sie hätte gedanzt un gesung
un wäre uff em Disch un de Stiehl e rumgesprung.

Em Erwin seini, die hats am dollschte getreb,
die is dann nimmi uffem Hocker geblebb.

Sie is ganz härt uff de Bodde geknallt,
dann hat se die Aue verdreht unn nur noch gelallt.

Em Walter seini war ach ganz schä hei,
die is em Rinkess in die Hänn gefall, do wars vorbei.

Er hat met eer erumgemacht,
sie hat ne angeguckt un nore gelacht.

Später hat er sie dann hemgefeert,
mer wes, ob unnerwegs noch was is bassert.

Die Musik speelt jetzt met Bumm Bumm:
“Bier her, Bier her oder ich fall um!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Do unne in de neu Stroß, do wohnt noch ener,
im Fernseh isser bekannt wie sunscht kener.

Beim große Breis wärd iwerne gelacht,
wer hätte das von unserem Wendelin gedacht.

Als Mewelrigger schafter schun drei Johr.
Jetz fangder dehäm a oh, er wärres net glawe, awer es is wor.

Deletscht isser von de Wätschaft hemgeschwankt,
do hatt die Stroß ball net gelangt.

Dehem hatter ä halb Stunn um Inlass gebeten
un kaum eingetreten, fing er an seine Bruder zu kneten.

Dan hatter sich nett vor de Arwet gedrügt
un hat in de Wohnung kräftich die Mewel verigt.

Dem Hans, dem hat das grad noch gefählt,
er is zum Pauker gerennt und hat die 110 gewählt.

Die sin dan a ganz schnell kum
un han de Rüges ine Bettche gebrung.

Dan hatter geschlaf wie ä Murmeltier
bis am negschde Da um vier.

Die Musik spielt dem Staar zum Trotz:
“In Zukunft wärd dehäm nimmi rumgemotzt!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

In Nerrermohr do hammer äner,
der had e Prinzje gried e schäner.

In de erschd Woch, do warer noch wie nei,
doch dieser Traum war ball vorbei.

Er fährt do rum, mer kanns net klawe,
wie zwe Stumme unn zwe Dawe.

De erschde Bause tat em läd,
doch dann wars Boxe sei greschdie Fräd.

Fum Gaspedal do willer nimmi runner,
uns Auto des werd immer krummer.

Sei Alter dut sich gar net freie,
denn jetzt will er sich sogar de BMW noch leie.

Doch der losst das niemols zu,
wann er im Jung sei Auto sieht, vergeßt der all sei Ruh.

Das Ding besteht jo nur noch aus Bause
un deswege loss ich dich net met meim Mobil sause.

Mitte im Dorf hat das Gefährt schunn oft geschtann,
doch er find immer zwee Dumme, wo Interesse devor hann.

Die stehn als vor dem Schlitte
un berode sich, wie dun mer daß jetzt werrer flicke.

Awwer sie bringene immer widder flott,
de Kalli hockt sich e ninn unn ab gehts im Galopp.

Die Musik speelt jetzt ganz salopp:
“Ach wie schön ist so ein heißer Bock!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

De Kimbel hockt in de Wertschaft unner de Stammtischglocke
und dut sich e Kreis von Zuhörer a locke.

Er verzehlt von de Arwet üwer Daach.
Er ist der Meinung, es wär e großi Plach.

Er rast mit de Raup tagein-tagaus
und hebt schon seit 3 Daach de selbe Bauplatz aus.

Er nimmt die Wasserwo un sucht die Flucht,
seitdem heißt er a de Kimbel uf de Flucht.

Owends do is er vun de Arwet ausgetrickelt.
Als Ausgleich werd anschließend e paar Biercher gebichelt.

No paar Biercher, do wert er ganz err
und mänt, er wer im Bagger verderret.

Un morjens, do steht de Bagger vorm Haus,
der Kimbel getraut sich nimmi eraus.

Drum Musikanten spielt dem Kimbel:
“Ich kaaf fer mei Bagger e Wimbelt!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Es is schunn iwwer ä Johr her,
do han se e Bauplatz geschob hin un her.

Ä vertel Johr später sin se dann druff kumm
Unn han dann schnell e Architekt genumm.

Er hat dem Bauherr dann schlicht erklärt,
was ehr do mache, des hat jo gar kee wert.

Doch de Theo war gescheiter
und baute am Häusje weiter.

De Lui, der macht de Speis, de Theo setzt die Stehen,
em Vadder dun vom Kaste schleppe weh die Been.

Es Haus, es steht, es iss a dicht,
zur Zeit do schaffen se am Licht.

De Hess, der schafft seit Woche schunn,
die Leitung bleibt jo doch noch krumm.

De Architekt hat de Löffel geschmess,
De Theo hat uff denne "gepeff".

Am Feierowend, do sin se vom greische heiser,
Awwer in de Wertschaft, do mache se weiter.

Es Heisje steht, de Theo is ganz froh,
sei Herz brennt jetzt ganz lichterloh.

Um sei neii Unnerkunft zu erhalle,
versucht er enner Fra zu gefalle.

Er sucht seit Woche schunn im Umkreis,
Er will e Fra für jeden Preis.

Ehr liewe Leit, suche fer de Opa a Frau eraus,
dann derfener a in sei neies Haus.

Die Musik spielt jetzt schon mit Trara
Einen Applaus fer de Theo un sei zukünftige Frau.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Im Haseck; do wohnt e Klenner,
der hot e klener roter Renner.

Do deno hat er sich e Ascona kaaf,
der is fer denne veel se schnell gelaaf.

Fer die Bundeswehr hat er noch voll getankt,
awer uff em Hemweg, do hats in ner Kurve nimmi gelangt.

An die Hauswand hat er de Opel geknallt,
do hat er gleich no em Fiat gekrallt.

Seit Silvester, oh Kraus, oh Schrecke,
do hat er e Schatz aus Hohnecke.

Die hat gemeent, mer wäre hinnerm Mond dehem,
bei Ihne do pflanze se schunn Gummibääm.

Die dun net gans so schnell roste
un sin a net so hart wie Poste.

De Führerschein hats beim Neckermann gewunn,
Es Auto hats uff em Schrott Haufe gefunn.

Wenns selde mol griet e Platter,
do helft em a noch so e dummer Macker.

Wann ehr mol sien des alte Flüwatü,
dann gehn um Gottes Wille schnell newehie.

Mache dem Mädchen ziemlich viel Platz,

denn es will zu seinem kleene Schatz.

Die Musik spielt mit viel Gewicht:

“Oh Hedwig, die Nähmaschine die geht nicht!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Mehr han e paar Jungrocker in Nerrermohr,
die sin zwische 70 unn 80 Johr.

Die han iwwer Dag viel Zeit,
die hans besser wie mehr, ehr liewe Leit.

Die Rente kassiere se vum Staat,
die versaufense in de Wirtschaft, schunschd wisse se ke Rat.

Sundags do treffe se sich uff de Fels,
uff em Hemweg krawwele se durchs Gehölz.

Sie kenne kaum noch richtig laafe,
Awwer es Motorrad dun se net verkaafe.

Ä Handwänche han se sich zugelegt.
De Vollschte werd mit dem heemgeschesst.

So wars vor kerzem ennem ergang,
Die Leit hann hinnerm Vorhang gestann.

Ehr Geld dät sich viel besser rendiere,
wenn se uns e Kaste Bier dun spendiere.

Die Musik spielt mit viel Trara:
“Vielleicht ist noch ein Spender da?!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Es is inzwischen schunn e alter Hit,
die Landfraue halle sich noch immer fit.

Sie feire wie die Bürstebinner
und wäre debei iwverhaupt net dinner.

An nem Samsdag, do han se sich uffgerabbelt,
es Rathaus hat an alle Ecke gewackelt.

Ehr Männer hann se de Heim geloss,
un daß hann se mit Wein dann ganz kräftig begoss.

Die Mannsleit hann se net gefunn fer abzuhole,
Sie sinn uff em Hemweg gefall durch die Dole.

Paar Woche später konnte se wärer denke
un han versucht die Glieder zu verrenke.

Am Fischweiher han se ehr Sport geträb
un han debei die Luft verpescht.

Sie wollte net nur uff em Trockene trainiere,
Sie wolltes amol im Wasser probiere.

Unn wie die Bällcher sinn gedotzt,
do han die Fischlein nur so geklotzt.

Freidags owends im Ramster Bad,
han se ehr Idee umgesetzt in die Tat.

Es Becke war schunn lang reserviert,

die Bademeister sin mit de Rettungsringe uffmarschiert.

Es Unernehme is glücklich verloff,
es is a niemand debei versoff.

Mehr sinn gespannt, was noch passiert,
Fer die hammer im nächste Johr in de Red ä Platz reserviert.

Ehr Musikante speele dem Verein:
“Pack die Badehose ein!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe !!!!

Die Zung werd mer im Maul schun langsam dick,
Uff em Rücke bin ich batschnass geschwitzt.

Es gebt noch viel iwwer die Nerrermohrer Leit zu verzähle,
Awwer ich will eich net länger quäle.

Es Debbersche werd schunn ganz zawelig do unne
un hofft, daß ich bald vunn de Läder dun kumme.

Walter, stell mer däbber ä Schoppe kalt,
Ich her jetzt uff, wenn sinn muß mit Gewalt.

Do unne gibts Bier un Wein gegen de Durst
Fer de Hunger hann se Weck un Wurst.

Zum Schluß du ich de Strauß noch daafe
un loss de Wein owe driwer laafe.

Strauß mit Wein begieße !!!!

Er werd jetzt hänge bis ins nächste Johr,
Do hammer werrer Kerb in Nerrermohr!

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!